

Privatisacion di lama birando un problema mas prevalente

Hotelnan no ta e unico ofensornan

Den e ultimo siman cu a pasa, pueblo a ser recorda atrobe tocante e problema creciente di privatisacion di nos costanan y lama. A mira e caso mas recien dilanti di St. Regis Hotel, unda un publicacion riba red social a muestra un cantidad di parasol instala riba costa di Palm Beach. E situacion aki causa un disgusto entre local- y turistanan, y atrobe ta trece dilanti e preocupacion cu Aruba poco poco ta perdiendo su costanan na entidadnan cu no ta respecta ley of propiedad publico.

Aunke den e ultimo aña ta mayormente hotelnan cu a haya nan mes den mal banda di percepcion publico, ta importante pa nota cu no ta solamente e entidadnan ey tin un rol pa hunga den e problema di privatisacion di lama.

Na maart 2023 caba, Bon Dia Aruba a tuma nota di algun hogarnan priva cu ta cera parti di lama pa publico, di e manera aki insistiendo cu esaki ta parti di nan propiedad priva. E tempo ey a mira un caso di un hogar na Savaneta unda e doño di cas a pone un borch di "private property" patras di cura unda tin e lama, y a cera caminda cu mata. E asunto a ser treci dilanti riba red social te cu Bureau City Inspector mester a hala aten-



cion di e doño.

Aunke a mira e problema aki resolvi relativamente rapido, esaki no ta un incidente isola. De hecho te dia di awe nos por mira ainda algun hogar y rentals cu ta cera caminda pa por yega na e lama situa patras. Durante weekend, Bon Dia Aruba a tuma nota atrobe di varios hogar y rentals cu ainda ta eherciendo practicanan cu ta viola e 'Landsverordening openbare wateren en stranden' (Ordenansa nacional awanan publico y nos playanan), unda ta stipula cu tur lama na Aruba ta publico, y pa stroba of limita acceso na dje ta en contra di ley.

Den e caso aki atrobe ta trata di e mesun cas na Savaneta cu su borch di 'private property'. Directamente pariba di dje por mira e mesun situacion unda un vacation rental



tambe tin borch pa publico 'KEEP OUT'. Na otro banda di e tereno, por a mira algun baranca poni pa limita acceso na e lama situa patras.

E dos instancia aki no ta unico den e area. Riba costa patras na Savaneta tin varios caso unda entrada pa lama a bira mas dificil of den cierto caso, descaradamente cera pa mantene hende leu di e costa. Aunke ta comprendibel cu propietario nan tin derecho pa proteha nan tereno priva, ta parce cu hopi erroneamente ta conta e costa den esaki.

E situacion a yega na un punto den e ultimo añanan unda cu constantemente mester taha riba e tipo di ofensa aki, pero ta parce cu tur biaha e tahamento no ta resulta den un resolucion. Negoshinan di rental en particular manera Airbnb, villas y hotelnan ta



sigui insisti riba nan derecho pa cera lama pa publico, y cada bes no ta mira regulacion adecua for di gobierno pa aborda esaki. Esaki ta trece dilanti e pregunta: Unda e

proteccion di nos costanan a keda? Lo e futuro mira pueblo di Aruba prohibi di disfruta di nos mesun comodidadnan publico?

Zr.Ms. Groningen staciona den Region Caribe pa proteccion

Zr.Ms. Groningen a tuma e tarea como e barco estaciona den Region Caribe over for di Zr. Ms. Holand. E barco patruyero a mara na Bahia di Santa Ana na Willemstad den weekend. Segun Wardacosta Region Caribe a informa den un comunicado, e lunanan binidero e barco aki lo ta activo den operacionnan anti-droga.

Banda di esey, tambe e barco lo para cla pa keda desplega suministrando yudansa di emergencia, manera rescata persona cu confronta problema riba lama.

Marina Real Hulandes tin cuatro barco patruyero di e categoria asina-yama 'Holland-klasse'. E barconan patruyero aki, cu ta subi ocean, ta conoci como OPV, y ta embarcacionnan cu despliegue flexible pa vigilancia di awanan costero. E barco



staciona ta traha riba awanan internacional, conhunto cu Wardacosta Mericnao, y cerca costa cu Wardacosta Region Caribe.

E NH90, helicopter di combate maritimo, ta bolbe sali abordo di e barco aki, pa sostene e barco den operacionnan for di laira.

Zr. Ms. Holland a yega su haf

di origen, cu ta Den Helder, fin di december. E ultimo lunanan, e barco a intercepta un total di por lo menos 9mil kilo di cocaina den region Caribe.

Cu presencia di e barco estaciona den nos region, Defensa ta contribui na paz y seguridad den Region Caribe.

